

31 DEC 1999

Mahathir-Rotary

MAHATHIR TERIMA ANUGERAH TOKOH ROTARY

KUALA LUMPUR, 31 Dis (Bernama) -- Perdana Menteri Datuk Seri Dr Mahathir Mohamad hari ini menerima Rotary Man of the Millennium Award daripada Rotary International District 3300.

Anugerah itu ialah sebagai menghargai sumbangan beliau kepada kemajuan dan pembangunan negara dan yang terbaru kejayaan Perdana Menteri membawa negara keluar daripada krisis ekonomi serantau.

Gabenor District 3300, Datuk Jaafar Mohd Ali, menyampaikan anugerah itu pada persidangan ke-65 pertubuhan itu di sini. Yang turut hadir ialah Datin Seri Dr Siti Hasmah Mohd Ali.

Kelab Rotary, pertubuhan yang dianggotai oleh tokoh perniagaan dan profesional, menawarkan khidmat kemanusiaan selain memupuk etika yang tinggi serta membantu memupuk muhibah dan keamanan.

District 3300 yang mempunyai 53 kelab meliputi kebanyakan negeri-negeri di Semenanjung Malaysia.

Ketika berucap, Dr Mahathir yang juga anggota Rotary semasa zaman mudanya di Alor Setar berkata perubahan pesat teknologi, kewujudan dunia tanpa sempadan dan kepesatan pengaliran teknologi memberi kesan besar kepada masyarakat.

Dalam konteks ini, amatlah penting bagi rakyat Malaysia bersedia untuk mendepani perubahan-perubahan ini, kata Perdana Menteri.

Dr Mahathir berkata, yang kaya, yang miskin, golongan bernasib baik dan golong kurang bernasib baik harus diberi peluang untuk memanfaatkan bersama akses kepada teknologi dan infrastruktur moden.

-- BERNAMA

GM/AFY FAZ